

Pasero

I

Farai un vers, pos mi sonelh,
e-m vauc e m'estauc al solelh;
donnas i a de mal conselh,
 et sai dir cals:
cellas c'amor de cavalier
 tornon a mals.

II

Donna no fai pechat mortau
que ama chevaler leau;
mas s'ama monge o clergau
 non a raizo:
per dreg la deuria hom cremar
 ab un tezo.

III

En Alvernhe, part Lemozi,
m'en aniei totz sols a tapi:
trobei la moiller d'En Guari
 e d'En Bernart;
saluderon mi sinplamentz
 per saint Launart.

IV

La una-m diz en son lati:
?O, Deus vos salf, don pelerin!
Mout mi senblatz de bel aizi,
 mon escient;
mas trop vezem anar pel mon
 de folla gent.?

V

Ar auziretz qu'ai respondut;
anc no li diz ni bat ni but,
ni fer ni fust no ai mentagut,
 mas sol aitan:
?Babariol, babariol,
 babarian.?

VI

?Sor?, diz N'Agnes a N'Ermessen,

?trobat avem que anam queren!?
?Sor, per amor Deu, l?alberguem,
 Que ben es mutz,
e ja per lui nostre conselh
 non er saubutz?.

VII

La una·m pres sotz son mantel
et mes m?en sa cambra, el fornèl:
sapchatz qu?a mi fo bon e bel,
 e·l foc fo bos,
et eu calfei me volenter
 als gros carbos.

VIII

A manjar mi deron capos,
e sapchatz aic i mais de dos;
et no·i ac cog ni cogastros,
 mas sol nos tres;
e·l pans fo blancs e·l vins fo bos
 e·l pebr?espes.

IX

?Sor, s?aquest hom es enginhos
e laissa lo parlar per nos,
nos aportem nostre gat ros
 de mantement,
qe·l fara parlar az estros,
 si de re·nz ment?.

X

N?Agnes anet per l?enoios:
Et fo granz, et ac loncz guinhos:
et eu, can lo vi entre nos,
 aig n?espavent,
qu?a pauc no·n perdei la valor
 e l?ardiment.

XI

Quant aguem begut e manjat,
e·m despoillei per lor grat;
detras m?aporteron lo chat
 mal e felon:
la una·l tira del costat
 tro al talon.

XII

Per la coa de mantenen
tira·l chat, el escoisen;
plajas mi feron mais de cen
 aquella ves
mas eu no·m mogra ges enquers

qi m?aucizes.

XIII

?Sor?, diz N?Agnes a N?Ermessen,
?mutz es, que ben es conoissen?
?Sor, del bainh nos apareillem
e del sojorn?
Ueit jorn ez ancar mais estei
az aquel torn.

XIV

Tant las fotei com auziretz:
cent e quatre-vinz et ueit vetz,
que a pauc no-i rompei mos corretz
e mos arnes;
e no-us puesc dir los malavegz,
tan gran m?en pres.

XV

E-us no sai dir los malavegz,
tan gran m?en pres!

- letto 354 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/pasero>